

粵西叢載

粵西叢載

一

粵西叢載卷四

奉直大夫前廣西桂林太平兩府通判汪森編輯

岳和聲後驂鸞錄

龍水客以萬曆辛亥三月初七日奉出守慶遠之命
四月十七日還里九月十七日疏請致仕十九日奉
旨下所司所司停覆復檄之任先是禮曹郎自嘉隆
來鮮以刺郡出者卽間見以爲僥得之矣余以客部
歷膳儀兩副郎先後十二改歲而有是命又僻在炎
徼狝狝狔狔之與處或謂不堪而心安之凡所爲乞
休者非以官亦非以地也再命之至而猶抗前請將
官與地之以矣李君實以范至能驂鸞錄來贐曰君

踰嶺而後驂鸞錄成應早寄我余曰弟實戔戔以奉
使則愧攬轡以移鎮則愧吳船而刺龍水之與帥靖
江寧敢多讓文穆以負知己君實領之遂以是年壬
子正月趣裝而日記其程以爲後驂鸞錄曰龍水客
者志地也

正月二十日停午偕門人周孝修登舟發西水嘉興陸
太和秀水吳儼五兩明府送之河干甫解維沈白生妹
倩以雀舫來期至學繡乃反語余曰無可贈行者飽喫
惠州飯細和淵明詩贈君止此矣余曰惠州不在天上
吾將束帶見督郵耳其幸而爲坡公不幸而爲黃文節
固安之若命無何許伯厚嚴圖南包彥平范長康以小

邇來余曰何以似我長康曰山如碧玉簪瘴來雲似墨
龍水距八桂五十舍距羅池又二十舍卽舉似無喻昌
黎柳州者過此以往未之或知余曰宜州昔人以爲地
牢推此類言之又安知不爲天堂邪相與胡盧一笑彥
平屬過武林從前太平守凌元孚問嶺右風氣徭俗及
諸飲食便宜狀且述元孚當日語曰彼土山川甲天下
使君情致自不惡獨二三臧獲鬱鬱不樂岑寂耳甫別
挾探奇行至者陸二孺也少與余讀書石佛梅花洲二
十六年往矣三孺才可凌雲一青衫不屑就輒高尚棄
去余婆娑人間爲時局弋慕行役不休對之顏厚所強
爲余解者以嶺右山水不負客耳遂訂游武林未作別

晚泊陡門以輕舠展先墓于乘園蘭于二橋與族人酒別

二十一日至高橋及石門而雨郁伯承來且以季父新寧州倅蕙相屬余曰龍水客直寄公耳何能爲新寧宇下乎次語兒靳明府來語其姻家汪中宇參我方帥柳慶故儒將也輕裘緩帶不廢嘯歌余曰我將過而問焉發語兒而水部兄之初比部弟季有方舟至宿彭老橋妹倩戴以介挾風雨至余襆被臥二鼓風甚黎明乃發二十二日午泊塘棲步長橋晚且泊距關可十五里許三十三日稍霽午入關問館于來青堂堂爲同省吳儀部別業面湖背郭從喧囂中不失閒冷

廿四日早謁先忠武王祠已展墓揖宗人于流芳亭循
桃溪出午與孟季小別同以介循九里松上飛來度三
竺禮大士于雙殿憩白雲舍作桑門饌舍舊爲坡公所
顏迹之烏有矣申度麥嶺捫石間字云同游楊傑蘇軾
王翰故坡公所署葺棘中乃不爲風雨蝕與以介盤桓
久之憩法相歸從金沙買小刀由定香橋循六橋與米
君夢同作客湖舫中丙夜歸來青而闇者以客刺目來
廿五日早與以介別乃入城報謁次轅門遇耒陽曾金
簡小儀約醒言于來青歸而先與余孟季宴坐久矣遂
具蔬供晤語夜分別去比部弟復呼酒醉床頭而水部
兄亦自外來把琰相向共證半生心事比部弟曰兄自

下帷攻苦及紆朝黻垂二十年無所不刻礪以有此行
蠻烟瘴雨幸善眠食欲根猶易剗名根未易除文字結
習政與名媾要之涉累猶然兒女情多耳余曰不然吾
年四十有四矣寧復能向少年場田百氏而掩雋乎第
以言吾所欲言與所能言而已言吾所欲言不欲不敢
出也言吾所能言不能不敢強也所慮欲根未易剗當
向元城先生越行後作學人水部兄曰實獲我心

二十六日辰與比部弟別及午而黃貞父施仲宣二小
儀以榼舫自湧金門至余欲放棹南屏過津公竹閣以
遲余兄故停棹中流已艤斷橋步錦塘上飛英滿地呼
平頭掇貯恬白棗中與主人隨手探得有刈薺者卽浮

白補之竣事以得全多者爲算勝未半水部兄至而來
青吳郎用伎樂舫來二小儀跋跋以不速辭余強乃往
未半輒去余與水部兄復促坐兩人酒不能以極量致
過一石劇醉乃散

二十七日孫司理偃虹過訪入城報謁迫暮赴柯都運
招于柳洲亭都運先守慶遠二年所代者以瘴鄉引疾
去而余適遇于茲以有茲亭之酌慶卽踰柳州三百里
而遙肯令子厚遂作勝塲語都運曰足下且以柳亭酒
爲慶守脂轄其縱澆之都運輒然

二十八日早命倌昭慶戒公偕霖公智沙彌以芥蔔四
缶來驢余紆途別乃別循城隍由表忠觀過慶樂巷訪

虞勲部德園勲部先期赴貞父招遲余于竹閣至則金
簡小儀陶君奭孝廉與高元玄津二開士在坐蔬供茗
飲閑房靚倩竹聲琅琅與人語相應非復曩時稠濃僧
舍矣西過宗鏡堂拾層級者三禮永明瘞塔下拜慧日
峰爲宋篆雋古前此未覩也過問澄公八十臘無恙乃
上丁婆嶺望五雲最高處六和在眼三折綰帶矣晚飯
逆旅登江舟江流春漲浩淼澎湃岡巒極岸與烟霧相
迷離濤聲之所漱齟齬欲鎗鎔實難爲懷推篷望西岸
則遠山層出若簇若馳與孝修嘯咏到江吳地盡隔岸
越山多之句數閱而寢

二十九日戒楫水部兄以札來余報之遲潮乃發及午

兄肩輿至余問何以戒慶守也曰弟于慶爲八千里遷人而非守也吾願弟爲八千里守而不爲遷人也吾嘗語弟以情事理法四關矣四者有方有圓有礙有無礙一入而情二入而事三入而理四入而法情圓而礙事方而礙理圓而方而無礙有礙蓋至法而卽方卽圓卽圓卽方卽情卽事卽理而無有礙之者子輿氏曰規矩方圓之至也君子行法以俟命而已矣吾所以語慶守者具是余頓首曰謹受教及申而汐至兄自涯反呼余曰當作江干送一詩寄我余與孝修曰諾凌潮渡三浙霧雨且暮宿王家兜疾風驚浪寤宿而已

三十日雨發申至富陽前嘉興譚青湖明府以臬幕署

事招游觀山山峙縣東偏因高爲城桐江南來勢實截之而北有小沙逆當其衝以護萬家之縣孫仲謀父子由此崛起良不偶然土人向未敢祠關武安王以孫氏故有之自今始其麓是也磴轉十仞祠肖羊裘先生再十仞許得鐘閣鐘治于元至正而欸似漢叩之清越江聲月色良夜互發當是滲骨再十仞許而祠文昌貌故尊偉余與青湖瞻揖之環望紫薇鎖石諸山蒼茫野色絕不似江南景物細雨濕衣引酌而別挂帆長風卽飛濤怒立不致作惡四十里宿新店

二月初一日霽發已至桐廬縣縣故一橫洲江水周之前有筆架諸峰亘峙作朝未刻絕瀏江灘新漲總至洶

洵懼人晚上七里瀨有懷康樂孤客傷游湍徒旅苦奔
峭之句再上爲鷓鴣門風濤加壯暮泊釣臺下急攝袵
以登肅謁嚴先生像像左爲方玄英右爲謝臯羽余曰
兩人故堪爲羊裘公耳孫遂上雙臺凡歷十五盤而得
東臺顏曰留鼎一絲西臺顏曰垂竿百尺中有平石可
三十肘而羸低回者久之返步而晚雲繚繞罡風襲人
磴左孤松偃蹇如虬如龍者七舟人指對岸鬱林中爲
先生墓余曰水湍山峭壑藏於此寧獨生前鬱孤亦復
死後輕奇登舟亟索篋中所有望桐官詩與孝修快讀
之蓋歲辛丑予以客部郎持節冊封淮藩歸艇夜發竟
阻登眺時語已十三年往矣

學西齋集卷四
初二日早至西口已過烏岑關關似展旗而偃臥瀏濤
中予舟蕩焉灩澦如象何以踰此未泊嚴州望富春驛
百步許晚發州渡從渡口望郡城翼翼虹亘新安江碧
若拖藍越十里宿桐溪埠

初三日雨帆挂大羊午及三河而風鬪宿九都口爲宋
十子九得雋處名范村其一爲諸生以老則理學家所
稱范浚氏故有五箴贈炙人口者隔岸爲仙桃山居人
云往往百年一結實左爲長蛇趨蛤形家者謬以此佞
山靈耳其後爲天子山相傳爲漢長沙太守孫文臺墓
業被發爲居民有

初四日早至女埠午泊蘭溪縣劉滄嶼明府出訪發二

十里宿湯溪之楊埠

初五日未刻抵龍游發里許泊亭步山北之橫沙

初六日早發灘石齒齒其湍急洄澍不減七里瀨望三衢可十五里許北岸土岡亘峙浮圖層出逶西則大石阜圓徑數十畝爲雞鳴山逶北爲浮石山支分劈脈蜿蜒稜裂晚泊西安縣

初七日發十里而蕭損之參知以尺一來曰君于建禮歸然靈光矣乃以一麾走萬里汲長孺不薄淮陽是其所以爲汲長孺者乎余答以仲詔書畫舫中語附候吏去六十里泊紅橋埠則常山在望矣

初八日疾風挾雨午始至至則龔圓甫明府出訪余入

城報謁訂游西高山

初九日遂霽家僕來送者以是日反作鄉書數十函殊苦稠濁迄晡乃竟圓甫邀遊西高寺寺爲嘉泰中勅建制故渾朴牟尼像亦復莊靜散步登藏閣從閣磴轉者三得積翠亭爲同年唐長公所題而借腕于玄宰史氏其西則西高峰在焉蓋常山西南北三面環而爲縣西高最傑出縣解于北山之腹而東面獨缺溪水當之隔岸則江右諸峰層出雲際矣日旰不獲上西高從亭中一眺呼燈踏山麓歸途距白龍洞不一里許從田塍中行過之澗水淙淙繞足下數武而得初洞口可二仞許泉瀑迸落望之黝然呼燈迹之有竇上出主者曰磴轉

百餘武爲中洞洞口可三仞許橫側劈裂二里許而竟厥竇稱是余又呼燈迹之度不能至又磴轉三百武許及嶺之十七而有穴下穿則向之泉竇上出者是已以無他奇輟步旋尋故步入詹參知定齋山館館後有石壑泉聲活如爲引滿與圓甫別則雨絲紛如矣歸而簷溜竟夜山城孤宿重衾爲薄

初十日發常山四十里爲草萍讀孫忠烈七言近體曰身從許國頻加愛髮爲憂時忽變蒼余壯其語爲孝修快讀數過步之者則王文成伯安擒寧濠南來詩也其目云得大駕南征渡淮報于此蓋伯安爾時有勇略震主之疑焉晚抵玉山而寢